

■ TRIBUNA POLITICA

La protecziun civila en il servetsch da la populaziun

CHRISTIAN RATHGEB,
CUSSEGLIER GUVERNATIV

Saja che auas grondas, Sbovas, epidemias u autras catastofas chaschunian donns considerabels; saja che la populaziun dal Grischun vegnia periclitada da situaziuns da miseria, la protecziun civila guida.

Il november 2002 cura lche malauras catastofas han periclità il chantun Grischun e sia populaziun, regivan cundiziuns extremas. Auas alpins idillics èn daventads anetgamain torrents furius sco diluvis, han tschiffà e tratg cun sai entiras chasas, stallas e vias ed han laschà enavos ina cuntrada devastada. La miseria da la populaziun che ha pers per part tut ses possess è stada gronda. Gronda è dentant er stada la lavur da las gidantras e dals gidanters. Maun en maun e cun grond engaschament han las autoritads, ils pumpiers, la polizia, la protecziun civila ed er l'armada gidà la populaziun pertutgada. En las 69 vischnancas grischunas ch'èn stadas periclitadas da las malauras èn stads en acziun dis a la lunga er 767 commembras e commembres da la Protecziun civila dal Grischun. La Protecziun civila dal Grischun è vegnida sustegnida da las camaratas e dals camarats da la protecziun civila dals chantuns Basilea-Citad e Turitg. La primavaira 2003 ha la Protecziun civila dal Grischun, en collavuraziun cun furmaziuns da la protecziun civila da 12 ulteriurs chantuns, prestà anc ina giada 15 000 dis da lavur d'ina persuna per exquir lavurs da reparaziun en las vischnancas pertutgadas, per rumir tschalers e

letgs d'auas e per allontanar la lozza dals champs.

Incumbensas multifaras

Gist per talas situaziuns d'urgenza extremas sa prepara la protecziun civila di per di, onn per onn. L'emprima intervenziun è chausa da las organizaziuns d'intervenziun d'urgenza, sco la polizia, ils pumpiers, la sanitad ed ils manaschis technics.

La protecziun civila vegn clamada sco segund med d'acziun en il sistem da coordinaziun da la protecziun da la populaziun per sustegnair las organizaziuns partenarias. En cas da catastofas ha la protecziun civila l'incumbensa da metter a disposiziun l'infrastructura da protecziun, d'alarmar la populaziun sco er da s'occupar da persunas periclitadas. Ultra da quai surpiglia ella er incumbensas en il sector da l'agid al commando e da la logistica. Plinavant tutgan er la protecziun da bains culturalis sco er lavurs da reparaziun suenter catastofas tar ses champ d'incumbensas.

L'organisaziun

En cas da catastofas e da situaziuns d'urgenza presta la protecziun civila lavurs impurtantas a favur da la cuminanza. En il Grischun s'engaschan 2500 umens e dunnas en la protecziun civila.

Mintgin dals 11 districts dal chantun Grischun dispona d'ina atgna cumpagnia da protecziun civila. Sin il stgalim dal chantun datti ultra da quai in battagliaun da la protecziun civila. Quel è

equipà cun apparats spezialis e po sustegnair organizaziuns partenarias entaifer curt temp.

Per motivs geografics ha plinavant er la vischnanca da Tavau anc in'atgna cumpagnia.

Scolaziun da basa da 2 emnas

Persunas ch'èn obligadas da far servetsch ston absolver ina scolaziun da basa da 2 emnas en il center d'instrucziun da protecziun civila Meiersboden a Cuir. Scoladas vegnan las persunas che prestan servetsch da protecziun civila d'instructuras e d'instructurs cun diplom federal. La protecziun civila porscha ultra da quai er scolaziuns spezialisadas, sco per exempel per sanitaris e sanitaris e per policistas e policists da la protecziun civila sco er scolaziuns da cader. Suenter la scolaziun da basa fan las persunas ch'èn obligadas da far servetsch da protecziun civila sin il stgalim da truppa curs da repetiziun da 3 fin 5 dis per onn e sin il stgalim da cader e da spezialists da 5 fin 14 dis.

Clamada a l'agid en cas da catastofas

Sch'ina persuna ch'è obligada da far servetsch da protecziun civila vegn clamada a l'agid d'urgenza en cas da catastofas – per telefon tras il cuman-dant da protecziun civila u a maun d'in cumond da marschar da l'uffizi da militar e da protecziun civila –, sto quella immediatmain entrar en servetsch. Lain sperar ch'il proxim cas serius na capitia anc ditg betg!